

桓仁縣志

署 龍光斗



第三冊
卷之九
風俗志
卷之十
實業志
卷十一
交通志
卷之十二
教育志

風俗志卷之九

民風

歲事

雜禮

婚嫁

喪葬

祭祀

墓祀

官祀

飲食

衣 居 水 方 器
服 住 大 言 用

風俗志

仁山知水性既不同畢雨箕風好亦互異蓋由人羣之
結合而成社會之習慣而生禮法哲人起而以禮成
欲以樂陶情因時因地不同遂至尚文尚質互異
同一人羣在游牧時代其風俗為何如至進化時代
其風俗又為何如又同一人羣一置通都大邑一置海
澳山陬兩相比較其各自風俗更為何如此詩三百貞
淫正變靡不從風以時有變遷而物有更易也桓邑
設治未久習尚尤形樸素俗之所成無非禮之所寓
撮要而記用備輶軒之采惟俟問俗者有以扶植匡

救云爾

民風

性情勁樸不事文飾尚慷慨重廉恥往古無論矣自近代以來生聚日繁農家者流約居百分之九十商賈居百分之三四讀書登仕者不過居百分之二三餘則游手好閒之輩此其大概而士農工商各業更為分論於左

士勤誦讀多質少文自光緒三年設治後始定學額二名附興京教諭兼管風聲所樹人知向學日新月盛有蒸蒸蔚起之氣象自設學至停科得登桂籍者二人由改創學校皆知講求新學留心實用並多數不憚遠涉留學他省以廣見聞因地高多山生質偏於剛勁均

重品行不尚矯飾學校中身名之檢束甚嚴筮仕者亦
皆以廉潔自飭

農殷力作不憚辛勞邊地苦寒歲僅一穫而傭值過
昂是以耕種之法不如內地之精密所幸生荒初墾土性
尚壯雖不施布肥料而有秋頗賦良以此故均不知研究
土宜振興實業沿陋就簡地利未盡誠足惜也況平地最
少借山開田專以人力牛犁之用甚少居民之蓋藏夙
鮮荒年無備斯為可慮

工無技巧且去通都大邑較遠因轉運銷售之未便故精
奇製造之不興土人仍沿儉素之風但取服用苟完不求

美備華裝是以土木陶冶而外餘藝不多見焉亦地勢人情有以限之也

商無專業一肆列貨多至數十百種有上自紬緞下至葱蒜之說以燒當兩行為大賈境內現僅數家資本尚稱殷實當地所產糧石除紅糧大多數銷售於燒行外餘則油糧粳米則各商均有轉運銷售於境外者商人以直隸山東兩省為多錢法未大疏通金融窘滯猶有以粟易布帛之風焉

按桓仁縣士居少數農尚守舊工多鄙陋商人外省人氏尤居多數所獲餘息均移轉他處亦利

權外溢之一弊此中隱憂本地居民不可不知宜勉力提倡振興勿稍緩焉

歲事

陽歷新年官紳學警互相祝賀照例停止辦公商戶間有以酒饌誌慶不停交易

夏曆正月初一日今之春節即舊之元旦昧爽之時家家盛服設香燭祀天地神祇次祀竈神祖先拜父母尊長舉家團聚食水餃形似元寶俗呼元寶湯以倡吉兆城市鄉村各具衣冠互相拜謁俗呼曰拜年戚友家有小兒者贈番蚨名曰增歲錢夏曆正月初五日俗呼曰破五家家以面色蒸饅饅而食又以初七

為人日初八為穀日初九為果日初十為菜日以日之陰晴占歲之豐歉

夏曆正月十五日為上元節又曰燈節家家供獻元宵通街懸燈結彩施放花爆鄉人作劇呼曰秧歌比戶歡迎謂其可以驅逐邪疫與古之儺略同雖近戲猶有古禮存焉清明節家家以麥麴作饽饽團聚而食此節無定期蓋以夏曆推定不出二三兩月中今名為植樹節屆期縣長暨各界首領植樹林區尚殷提倡

夏曆三月十六日為祀山神農人共食祭餘俗呼此日為老把頭生日

夏曆四月十八日為縣城關帝廟鄉村娘娘廟香大會期赴會者紅男綠女概不乏人

夏曆五月五日今謂夏節即端陽節家家食角黍粉團懸繭虎蒲艾於門小兒之絲絲繫臂猶古續命縷之義

夏曆六月六日俗謂蟲王生日農人就廟宰牲報饗蟲王以祭餘會食

夏曆八月十五日為中秋節家家以酒食相慶先一二日以月餅果品互相餽送夜間陳祀庭中曰拜月

夏曆九月初九日為重陽節登高之舉以城鎮為盛

陽曆十月十日為雙十節即民國紀元武昌起義及正式政府

成立之日各機關放假祝賀而鄉農仍無何等表示

夏曆十二月初八日稟泰豆麥粟穀梁炊飯食之曰臘八粥

夏曆十二月二十三日以香飴紙馬祀竈以酒灌竈前曰辭司

命俗呼曰過小年

夏曆十二月逢大建以三十日為除夕逢小建以二十九日為除夕
家家懸燈結彩粘貼春聯取除舊更新之義竟夕不眠曰
守歲致拜尊長曰辭歲

雜禮

鄉飲之禮今鮮舉行鄉人每於新年互相燕會名曰會年
茶猶古鄉飲之義

人民相見以鞠躬代昔日之長揖以握手為最相親湯熟餅
會生兒三日曰洗三親友各以米麴豚蹄相餽曰下乳及至十
二日酬筵俗呼曰辦十二日

會親酒嫁女家過禮之日張筵款待親友俗以此名呼之
遷居親友或有以食物相餽俗呼曰燎鍋底

祈禱惟旱乾之時以求雨為急農人頭束柳枝呼天乞食昇
龍王牌遇廟宇即焚香叩祝雨後報祀名曰謝降

巫覡俗呼曰乂馬鄉人請治病症名曰跳神愚夫愚婦多被
所惑屢經嚴禁此風稍息

鋪戶新張相契者送綾屏喜聯或紅毡等物名為賀鋪鋪

主設筵酬謝名曰開市喜酒

起造建築既成親友送物致賀曰賀房

神道土地廟七聖祠山神廟狐仙堂鄉村到處皆有每月朔望鄉人或有送香燭奉默求靈佑者

按禹貢分九州詳土壤不載風俗以為人民習尚隨化導為轉移桓仁僻處邊徼開闢雖已四五十年而人民原多來自外省四方雜處風俗因難純一勢必善者因之陋者正之雅化之興是司風化者之責也

婚嫁

婚禮父母為主無父母則尊長主婚其無親族不得不自為主者亦有之先之以媒妁之言請合兩姓之好次以牒書其年庚交互筮算名曰合婚婚約既成由媒氏議定聘禮由男家擇吉日備禮品邀戚友偕媒人致送女家女家內眷攜女出見酒食款接所贐禮物是為下定亦曰過小禮即古納采問名之意龍鳳柬今改為官製婚書迎娶前五六月或二三月間由男家擇吉日以衣服簪環豬酒名物致送女家名曰過大禮即古禮納徵之意惟聘禮多以金錢為主豐者二三百元儉者五六十元不等至衣服各事均由女家開單媒人兩造商推斟酌製備婚期將近媒人送庚帖於女家俗呼曰年命帖用紅柬

開明行禮時日與屬相之忌避贊以吉語並以麪食相餽取
日進蒸騰之義與古禮請期之意相符婚期前一日新郎
盛服拜祖祭墓及尊長各屬披紅乘馬賓客數輩亦乘
馬陪行鼓吹旗鐸前導綵輜隨行繞行街市俗呼曰走
轎鄉村無綵輜可賃以車代之飾以紅布次日親迎鼓吹導
從如前並有娶親女賓一人乘車同往新郎來轎及門女
之兄若弟詣轎前揖婿亦答拜相將至客室少憩引婿拜
祖先及岳父母並外姻尊屬入內室女肅妝坐婿至相向坐
女用竹箸擲床上婿取一二雙而出送親女賓以粳飯食
女女含而嚙之以紅帕覆女面女諸父兄弟抱送轎中諸姑伯